

KABAKTIANG MINGGU KADUA

SIAP-SIAP

- Jamaat belajar lagu-lagu baru¹
- Sombayang di konsistori
- Majalis baca barita jamaat

A. DATANG PAR TUHAN

MARI KATONG IBADA

Pnt : Basudara samua yang Tuhan sayang, "...*Labe bae lati ale pung diri biar ale iko Allah pung mau tarus, macang deng orang yang rajing lari pagi biar dia pung badang kuat. Kalo katong rajing lati katong pung badang, akang bagus par katong pung badang, mar akang pung guna cuma waktu katong ada di dunya ni sa. Mar kalo katong rajing lati katong pung diri par iko Allah pung mau, akang pung guna banya par katong. Barang, Allah su janji kalo akang pung guna bukang cuma di dunya ni sa, mar tarus-tarus sampe di sorga lai.*" (1 Timotius 4:7, 8)

Kampinjang² babunyi tiga kali **Jamaat badiri**

J : Manyanyi

[Waktu jamaat manyanyi, orang-orang yang pung tugas dalang ibada (*majalis yang pung tugas, pandita, majalis jamaat yang laeng, orang yang baca Alkitab, deng kolektan*) maso ka tanpa ibada.]

01. TUHAN ADA DENG KATONG DENG BILANG TABEA³

Pdt⁴ : Basudara jamaat, ibada yang katong biking sakarang ni, akang jadi tagal Allah Bapa yang biking dunya deng akang pung isi samua ni pung sayang, deng tagal Tuhan Yesus Kristus yang kasi selamat katong deng Tuhan pung Roh yang biking katong pung hidop jadi baru tu.

J : Manyanyi

1 . 1 . ||

A - min

Pdt : Tabea basudara jamaat samua!

J : Tabea bapa/ibu⁵!

02. JAMAAT MANYANYI

(Langsung dudu)

03. ORANG-ORANG YANG IKO YESUS

Dkn : Jamaat, mari katong datang la mangaku katong pung diri par Allah tagal katong sadar katong ni sapa:

--- *Jamaat tado la satu-satu mangaku dia pung dosa par Allah* ---

Dkn+J : Sio, Tuhan Yesus e! Bapa su tabus katong samua pung dosa-dosa tagal Bapa sayang katong. Mar, katong seng parna sadar deng apa yang katong biking. Katong jaga balas Bapa pung sayang deng katong pung cara hidop yang seng iko Bapa pung mau. Sio Bapa e, kasi ampong katong jua!

J : (*Manyanyi.....*)⁶

¹ Belajar lagu baru seng sama deng latihan lagu. Tim musik yang pung tugas dalang ibada (kantoria) bisa manyanyi lagu yang nanti dapa pake dalang ibada deng batul biar jamaat bisa dengar la manyanyi akang deng batul.


² *Kampinjang* ni lonceng gareja.

³ *Tabea* ni pung arti sama deng "kalwedo" ka "kidabela". Bisa jua bilang, "Pagi bae" ka "Malang bae".

⁴ Bisa pandita, penatua, ka sapa sa yang pimping ibada.

⁵ Bisa pake istila laeng yang orang biasa pake di jamaat-jamaat ka daera-daera macang nyong pandita ka nona pandita, mama pandita ka papa pandita, bapa penatua ka om penatua, ...

⁶ Lagu yang dapa pili par manyanyi tu musti soal mangaku dosa deng minta Tuhan kasi unju Antua pung hati bae.



Dkn+J : Katong mangaku mau hidop iko Tuhan Yesus tarus, mar katong jaga kasi biar katong pung diri par anyo iko dunya pung aros. Katong seng anggap kalo Bapa tu dasar dalang katong pung hidop ni. Tagal itu sio Tuhan Yesus e, tolong kasi kuat katong jua, biar katong bisa jadi Bapa pung orang-orang yang salalu hidop iko Bapa pung mau, sama deng apa yang Bapa su kasi unju dalang Bapa pung hidop par katong. Tolong katong par jadi jambatang, biar lewat katong orang laeng bisa tau kalo Bapa batul-batul sayang dong. La tolong katong lai jua biar katong bisa sayang deng kalesang samua yang Bapa su biking.

J : *(Manyanyi.....)*

04. MARI KASI BIAR TUHAN YESUS ATOR KATONG PUNG HIDOP

(Langsung badiri)

Dkn : Basudara yang Tuhan Yesus sayang e! Kalo katong iko Yesus, itu pung arti katong batul-batul kasi biar Allah ator katong pung hidop antero-antero. Deng cara bagitu Antua bisa roba katong pung hidop jadi baru deng kasi kuat katong par biking Antua yang kasi selamat katong tu pung mau. Antua su bilang kata, *“Mar, orang-orang yang taru harap par TUHAN, Antua kasi kuat dong kombali. Dong macang deng burung guheba yang tarbang tinggi pake akang pung sayap yang kuat. Dong lari mar seng suak. Dong bajalang mar seng lala.”* (Yesaya 40:31)⁷

J : *(Manyanyi.....)*

(Langsung dudu)

B. BACA DENG DENGAR ALLAH PUNG AJARANG

05. SOMBAYANG MINTA TUHAN PUNG ROH TOLONG

Pnt : “Sio Tuhan e! Katong minta biar Tuhan pung Roh tolong katong waktu katong baca Alkitab ni jua. Tolong katong jua biar katong bisa mangarti Bapa pung Ajarang yang katong mau dengar ni deng biar katong bisa biking akang dalang katong pung hidop sabang hari.”

J : Amin!

06. BACA ALKITAB

(Baca sama-sama deng Penatua yang piming)

Nats Alkitab yang katong baca hari ini ni dari Akang bilang bagini:

(Abis baca, Penatua bilang:)

Par basudara samua yang dengar Allah pung Ajarang deng yang biking akang dalang hidop sabang hari, apa tempo sa deng di mana sa, basudara tu orang yang paleng sanang.

07. MANYANYI DENG HATI SANANG TAGAL SU DENGAR ALLAH PUNG KATA-KATA

(Dari KJ No 473a ka 473b)

- Haleluya, Haleluya, Haleluya *(Par Minggu Biasa, Tuhan Yesus Hidop Kombali, Tuhan Yesus Nai ka Sorga, Tuhan pung Roh Turung, deng Kajadiang)*
- Hosiana, Hosiana, Hosiana *(Par Minggu Sangsara)*
- Maranata, Maranata, Maranata *(Par Minggu Adventus)*

08. RIWAYAT

09. DUDU TADO LA INGA-INGA RIWAYAT (Waktu itu, ada orang yang barmaeng lagu satu pake orjen ka suling, ka alat musik laeng)

10. JAMAAT MANYANYI

⁷ Bisa pake nats laeng yang bicara soal hal yang sama.

C. JAMAAT PUNG JAWABANG

11. MANGAKU KATONG PUNG PARCAYA

(Langsung badiri)

Pdt : Basudara jamaat, mari katong mangaku katong pung parcaya, sama-sama deng samua orang yang parcaya di antero dunya ni, mulai dari dolo sampe sakarang. Mari katong bilang bagini:

Beta parcaya par Allah Bapa
yang pung kuasa par samua-samua yang ada.
Antua yang biking langit deng dunya ni.

Beta parcaya par Yesus Kristus,
Allah pung Ana satu areng-areng,
yang jadi katong pung Raja.

Antua ada dalang Maria pung poro tagal Allah pung Roh,
la lahir ka dunya biar kata Maria ni masi parawang.

Antua dapa siksa waktu Pontius Pilatus pegang parenta.
Antua dapa salib, mati, la dapa kubur.
Antua turung ka orang mati pung dunya,
la hidop kombali pas akang pung lusa.

Antua nai ka sorga,
dudu di Allah pung sabala kanang,
la pegang parenta sama-sama deng Antua
yang pung kuasa par samua yang ada.

Antua nanti datang dari sana
par jadi hakim par samua orang
yang masi hidop deng yang su mati.

Beta parcaya par Allah pung Roh.

Beta parcaya kalo Allah su pili katong
par jadi Yesus pung orang-orang
yang taika jadi satu di antero dunya ni,
deng sama-sama tarima apa yang bae dari Antua.

Beta parcaya kalo Antua kasi ampong katong pung dosa-dosa
deng nanti kasi hidop katong pung badang kombali,
la katong hidop tarus-tarus deng Antua.

Amin.

(Langsung dudu)

12. MANYANYI PUJI TUHAN: KOOR/VG/TRIO/SOLO/KA YANG LAENG

13. MINTA DANGKE PAR BERKAT DARI ALLAH :

Dkn : Jamaat, mari katong kasi katong pung tanda minta dangke par Allah. Akang jadi tanda kalo katong minta dangke dari Antua tagal samua yang Antua su kasi par katong. Waktu biking bagitu, mari katong inga Antua pung Ajarang yang bilang bagini:

“Tagal samua-samua yang katong pung tu asal dari Bapa. La apa yang katong bawa ni jua, Bapa yang kasi akang par katong.” (Kitab Pertama dari Orang



Israel pung Sejara⁸ 29:14b)

J : Manyanyi (*waktu kasi dong pung tanda minta dangke*)⁹

14. *SOMBAYANG MINTA DANGKE TAGAL SU KASI KOLEKTA* : (Diaken yang pung tugas)

15. *MANYANYI PUJI TUHAN*: KOOR/VG/TRIO /SOLO/KA YANG LAENG

16. *SOMBAYANG PAR GAREJA DENG DUNYA* : (Pandita/Penatua/Diaken yang sombayang)

D. ALLAH UTUS JAMAAT DENG JANJI PAR ADA SAMA-SAMA DENG KATONG

17. *ALLAH UTUS*

(*Langsung badiri*)

Pdt : Basudara samua e! Deng Tuhan pung sayang, bale la biking apa yang basudara dong jaga biking dalang basudara dong pung hidop sabang hari. Taru basudara dong samua pung hidop par Antua, waktu biking basudara dong pung tugas yang Antua su parcaya par basudara dong satu-satu.

J : Manyanyi

18. *ALLAH JANJI PAR ADA SAMA-SAMA DENG KATONG*

Pdt : Sakarang, mari katong dengar Allah pung janji,
"Beta minta biar Tuhan Yesus Kristus kasi kuat deng tolong basudara jamaat dong tarus. Allah Bapa sayang basudara jamaat deng Tuhan pung Roh jaga basudara jamaat dong samua, hari ini sampe tarus-tarus."

J : Manyanyi

$\overline{3\ 3} \quad \overline{3\ 2} \quad \overline{13\ 21} \quad 5 \dots \parallel$

A-min, a-min, a-----min.

----- **Dudu** tado la minta dangke dari Allah -----

(Jamaat tolong jang kaluar kamuka pandita deng majalis dong. Pandita deng majalis-majalis bajalang kaluar la badiri di muka pintu. Tarus pandita deng majalis-majalis pegang tangang deng jamaat, bagitu lai jamaat deng jamaat. Waktu dong samua ada pegang tangang, kantoria ka majalis yang pung tugas pimping lagu.)

⁸ Ini kitab 1 Tawarikh.

⁹ Bisa manyanyi deng banya cara.

